



## Il 10avel Top Pop Rumantsch – Current da Cuira

■ (cp) Il dieschavel Top Pop Rumantsch preschenta puspè ina premiera, el dat la vusch ad ina gruppa che chanta normalmain en dialect tudestg. Ils Notschtrom da Cuira fan la «Proxima damonda». **Exclusivmain sin Radio Rumantsch.** Chantar en il linguatg mamma avria barrieras, di Daniela «Candy» Candinas, quai laschia daventar pli persunala la chanzun. Perquai ha sia gruppa da rock Notschtrom bandunà l'englais e tschernì il dialect da Cuira sco lingua da chant. Quai gia avant trais onns circa. Ma uss emprova Daniela da rumper anc in'ulteriura barriera. Pertge che sia outra lingua da chasa – il num da famiglia tradescha – è il Sursilvan. Damai ina chanzun rumantscha sco nova sfida per ils Notschtrom. Sustegn direct survegn la chantanta davart dal tastadur da la band, il Flavian Gieriet, ch'è creschì si a Domat. Ils dus fan uss in bel giu da «clom e risposta» en il toc che porta il titel «Proxima damonda» e

che sa splega sur in ritem alert a la moda dals onns otganta. In'expressiun d'energia positiva saja la chanzun, manegia Daniela Candinas, in appel da sa fidar da l'agen giudizi e da na sa laschar irritar da dumondas existenzialas. E la vusch frestga da Candy conferma il cuntegn.

Notschtrom – la gruppa da Cuira, è naschida l'onn 2005 or dals rests da la band Strike. Da la partida èn la chantanta Daniela «Candy» Candinas, il ghitarrist Marco «Jollo» Tscholl, il tastadur Flavian «Flavi» Gieriet, il bassist Aris «Dögi» Dogas ed il batterist Mario «Stick» Melcher.

Il schaner 2006 han ils Notschtrom publictà lur emprim album «Schära, Shtai, Papier», sortì sin il label da la firma K-tel. Dapli infurmaziuns sin [www.notschtrom.ch](http://www.notschtrom.ch).

**Cumposiziun: Marco Tscholl, Flavian Gieriet**  
**Text: Daniela Candinas, Benedetto Vigne**  
**Producziun: Manfred Zazzi, Notschtrom .**

### proxima damonda

proxima damonda: tgi eis ti e tgei la veta mintga gi?  
 proxima damonda: sas ti tgei quei che fa che ti resentas tei quei che muossa l'olma a ti?

e sche ti rispundas la verdad ei quei che ti sentas neu e crei a ti  
 tut la verdad en tei

proxima damonda: ei l'amur caussa da mintgin e da mintgina?  
 proxima damonda: tgei color han tes siemis oz sut la glina e pertgei ein tons buc perina?

e sche ti rispundas la verdad ei quei che ti sentas neu e crei a ti  
 spira verdad en tei